

**PEMBERITAHUAN PERTANYAAN BAGI JAWAPAN BUKAN LISAN**  
**MESYUARAT KETIGA, PENGGAL KEDUA**  
**PARLIMEN KEEMPAT BELAS DEWAN RAKYAT**

**PERTANYAAN : BUKAN JAWAB LISAN**

**DARIPADA : TUAN HAJI AWANG BIN HASHIM [ PENDANG ]**

**SOALAN**

**TUAN HAJI AWANG BIN HASHIM [ PENDANG ]** minta **MENTERI INDUSTRI UTAMA** menyatakan apakah perancangan Kerajaan dalam meningkatkan pengeluaran getah, padi dan kelapa sawit serta apakah kaedah Kerajaan bagi menaikkan pendapatan kepada pengusaha-pengusaha dalam industri komoditi ini.

**JAWAPAN**

Antara pendekatan yang sedang diusahakan oleh pihak Kerajaan dalam meningkatkan pengeluaran sawit adalah dengan menghasilkan bahan tanaman kelapa sawit yang berhasil tinggi dan menggunakan pendekatan teknologi kejuruteraan genetik dan genom bagi memastikan penghasilan tanaman kelapa sawit yang berkualiti. Selain itu, Kerajaan berusaha mengoptimumkan amalan-amalan agronomi dan melaksanakan penanaman semula serta memantapkan pekebun kecil dengan keperluan asas bagi menghasilkan tanaman sawit mampan.

Bagi meningkatkan pengeluaran getah, Kerajaan melalui Lembaga Getah Malaysia (LGM) telah memperkenalkan klon getah bernilai tambah tinggi untuk digunakan oleh pekebun kecil yang mampu mengeluarkan purata hasil sekurang-kurangnya 1,500 kilogram satu hektar setahun.

Selain itu, LGM bersama agensi pelaksana lain seperti RISDA, telah mempertingkatkan aktiviti pemindahan teknologi bagi menggalakkan pekebun kecil untuk mengamalkan Amalan Pertanian yang Baik (GAP) dalam industri getah supaya dapat meningkatkan pengeluaran dan pendapatan pekebun kecil. Antara GAP yang disarankan termasuk

penggunaan baja dan racun, penggunaan bahan rangsangan, teknik penorehan dan penyelenggaraan.

Menurut maklumat yang diperolehi daripada Kementerian Pertanian dan Industri Asas Tani, antara usaha yang dilaksanakan bagi meningkatkan pengeluaran padi adalah dengan memperkenalkan varieti padi baharu yang lebih tinggi rintangan penyakit, memperkenalkan varieti padi seperti padi wangi dan padi pulut yang mempunyai harga pasaran yang lebih tinggi, memperkenalkan inisiatif penyatuan pengurusan jelapang padi supaya pesawah dapat menikmati *economics of scale*, dengan keluasan sawah dipastikan tidak kurang daripada 5 hektar dan memberikan penekanan kepada GAP atau manual tanaman padi (*rice check*) supaya produktiviti per hektar pesawah meningkat.

Kementerian menggalakkan integrasi tanaman dan ternakan di ladang-ladang kelapa sawit dan getah yang pekebun kecil boleh memilih sama ada untuk mengintegrasikan tanaman kontan, sayur-sayuran, buah-buahan atau menjalankan integrasi ternakan seperti lebah, kelulut, lembu atau kambing untuk diusahakan bersama tanaman mereka. Kaedah integrasi ini dapat membantu meringankan beban pendapatan pekebun kecil dengan tidak hanya bergantung kepada komoditi sawit dan getah.

Selain itu, Kementerian juga melaksanakan Insentif Pengeluaran Getah (IPG) dengan paras harga pengaktifan sebanyak RM 2.50 sekilogram bertujuan untuk mengurangkan beban ekonomi pekebun kecil getah di samping menggalakkan mereka untuk terus menoreh sewaktu harga rendah di pasaran.

Sekian, terima kasih.